

Nos steelband ? Importancia di un "steelpan"



Dos siman pasa cu mi tabata na un di e mallnan, e tocador di "steelpan" a bay for di su lugar un rato, pa "algo personal". Na e momento ey un hoben a acerca e "steelpan" y cu su dedenan a bati riba dje. Mes ora mi a para e hoben y a mustre riba e consecuencia di esaki.

"E no ta haci nada! Pakico bo ta worry bo cabez?"

Ey nan mi a cuminsa splica cu e un di e "pannan aki" (number oficial ta Steelpan) ta costa mes hopi of hasta mas hopi cu e brommer na cual e tabata leun. Cada batimento cu dede riba e "pannan" aki por saca e pan for di su entonacion. Mi a splike di e "maleta rondo" cu tabata tin den cercania y bise cu esey ta su cashi pa warde aden contra solo y contra awacero y cu ta proteha e calidad tonal di e pan contra e elementonan.

E pan aki no ta e steelpan corta, kima, y entona na un manera bruto pa toca riba caya. Esakinan ta pannan fini y cualquier cos chikito por saca nan for di nan perfeccion tonal.

Mi a corda mes ora riba e lectura cu reverendo **Sydney Jacobs di Holy Cross Anglican Church**, kende ta dirigente di **Excelsior Steel Academy** a tene algun siman pasa na IPA durante un di e anochinan interesante di charla di IPA.

Reverendo Jacobs ta Pastoor di Holy Cross Anglican Church na San Nicolas **mas di 25 aña**. El a papia tocante e steelpan y di e academia cu ta usa steelpan como instrumento pa educacion y cu steelpan por tin su lugar legitimo den sociedad.

Reverendo Jacobs a bisa cu

"bo mester di e arte pa crece y desaroya bo mes. Esaki ta filosofia di Excelsior Steel Academy."

E number a ser tuma pasobra Excelsior ta significa **"ainda mas halto"**, bo ta sobresali y yega mas y mas halto den bo logronan.

RAPORT CU 8, 9 Y 10 PA MUZIEK Y SIN SA NADA

A cuminsa cu Excelsior cu yudanza di **UNOCA** pa promove arte di musica usando e bari (steelpan) como instrumento musical. Pa mira e bari, no manera un set di bari di petroleo cu por haya den Valero, Texaco etc. y haci boroto riba caya cune.

Reverendo a laga sa: **"Ora hende mira un steelpan prome cos cu nan ta haci ta dal cu nan dedenan riba dje. Ora bisa nan "no haci tal cos, nan ta wak bo", bo ta haya como contesta: "Pakico tanto beheit?" Ta Bleki e ta!"**

Nan no ta compronde cu e "bleki ey", e steelpan ey, a wordo entona te perfeccion, entona manera bo ta entona un piano of cualquier otro instrumento musical cu tur su calidadnan tonal cu bo mester den un instrumento musical pa trece afo su color y dune e resonancia pa haci e placerito pa bo orea.

Pues ora bo mishi cune inesperadamente, tambe dependiendo unda bo a mishi cune, bo por sak'e for di entonacion.

E instrumento aki ta asina sensitivo cu si bo pone lague den solo e por perde su calidadnan tonal. Esaki debi na su expansion y su reduccion, esta cu e

por krimp. E ta perde su calidad tonal.

E reverendo a splica cu e no ta djis un bari di petroleo. E tabata un bari di petroleo na comienzo. Ora el a yega Aruba como bari, a zink e, pone notanan, duná nan tono y toca riba caya etc.

El a eleva di e concepto aki y bira instrumento di tur sala, unda ta duna presentacion.

Un di e cosnan cu rev. Jacobs ta siña su studentenan ta cu, **"bo ta sea bira un musico y gradici e publico pa a bin scuchabo of bo por bira un musico y cu hende ta paga pa scuchabo toca y scucha kico bo ta presenta."**

Den sistema di scol na Aruba ta haya riba rapport, punto pa **"muziek"**.

Rev. Jacobs a splica su audiencia aki cu e mucha ta bin cas cu su rapport cu **"acht, negen y algun biaha hasta tien" pa "muziek"**.

Bo ta puntra e mucha kico ta un **"G sleutel"**, **"trebel clef"**, un **"notenbalk"** etc. nan no sa. Sinembargo nan tin un **"tien"** pa muziek. Tin algo robez aki. Con bo por tin un **"tien"** pa **"muziek"** y ora bo haci un pregunta simpel di musica bo no por contesta?

Henter sistema educacional no ta mira algo robez aki? Esaki ta pa añanan caba.

EDUCADOR MES NO TA MIRA EXAMEN


Tin hende cu ta bay les di musica y ora puntra nan, despues cu nan termina e diferente scolnan, riba ki nivel nan a termina, riba ki nivel nan por presenta, unda nan conocimiento musical ta, nan nivel teoretico, cu cual nivel internacional bo por compara nan, nan no tin contesta.

"Ata hendenan ta bin puntrami si mi por toca un acorde di Re (D) riba steelpan?"

Bo por toca acorde D of D7 riba steelpan of cua cu ta.

"Bo por toca kico bo kier riba steelpan. Ta compronde bo mester compronde bo teoria di musica. Bo mester compronde cu un acorde ta consisti di tres tono, dependiendo di e "clave musical" cu bo ta den."

No ta e instrumento ta determina e acorde, ta e clave musical cu ta determina kico bo ta toca riba e instrumento. Esaki ta e filosofia di Excelsior.



Excelsior a asocia su mes cu **Royal School of Music di London** cu tin un curiculo concepto di teoria di musica, di grado un pa 8 y cu ehercicionan practico. Studentenan di Excelsior ta wordo prepara pa examen.

Ta busca aki examinadornan profesional y nan direccion ta ser manda London.

Comunicacion ta keda estableci entre e examinadornan y comision di examinacion di London. E examen ta wordo prepara na London y manda pa e examinadornan.

E examinador nan ta busca lugar pa tene e examen. Reverendo Jacobs mes no ta mira e examinacion y ni unda e examinacion ta tuma lugar e no mag ta presente.

E examinadornan despues di examinacion di studentenan ta manda e examen pa London y despues tur hende ta djis sinta warda e resultadonan yega for di London.

Cu resultadonan positivo di examinacion te na grado 4, mester gradua cu distincion.

Cu diploma di 1 te 4 e estudiante tin acceso pa universidadnan na Merca cu ta duna estudio di steelpan como instrumento.

Cu grado 4 bo ta wordo acepta si bo tin diploma **HAVO**.

Bo ta wordo acepta na universidad si bo tin diploma grado 4 hunto cu bo habilidad musical, teoria y ehercicionan practico

Ora bo ricibi diploma di **Excelsior** bo ta ricibi un **diploma internacional** y bo por bay na cualquier pais den **Caribe y Europa** y sigui despues den

cualquier institucion musical pasobra bo ta na nivel equivalente na cualquier estudiante cu a pasa e cursonan na London mes.

SHARISSA GRANGER MUSICOLOGO

Un di e studentenan aki ta e hoben **Sharissa Granger** cu a duna un demostracion di cancionnan clasico riba steelpan, durante e mes anochi. Sharisa como mucha a sigui les cerca rev. Jacobs, termina na Aruba, bay exterior sigui su estudio riba steelpan y awe ta un **musicologo diploma** cu ta biahando mundo pa charla y lecturanan. Ultimo añanan hasta ora e bin Aruba e tin cu conta cada minuut y ora di dia pasobra e tin compromisonan den exterior pa atende cune. Aña pasa el a hasta toca na **Trinidad** den e concurso di mas grandi di steelband na mundo, pa un di e steelbandnan grandi di e pais. Asina leu el a yega tocando steelpan como mucha crece, studia y awe ta un profesional admira y reconocí.

For di mas o menos 12 aña pasa cu a cuminsa cu e academia, cuanto tocador di steelpan a bay tuma les, di e cantidad grandi cu tin na Aruba.

NINGUN di nan! **Pakico?** Pasobra tur a kere cu nan ta toca tanto aña caba, tin experiencia di tanto aña caba, y no tin nada mas di siña. Nan a lubida cu pa bo ta un musico bo tin cu studia musica y mayoria di nos tocadornan di awe no ta pensa riba esaki.

Juby Naar